

1 JON

Anjam a boleq donaq a iga unem

¹ Anjam a nambile unu. Anjam di nami soqnej. Anjam di iga quoqnem. Gago nãdamu na unoqnem. Gago ban na dego ojoqnem. ² Nambile di boleq donaq a iga unem. Nambile di gaigai sqas. Nambile di aqa Abu wo sosiqa boleq donaq a iga unem. Deqa iga a qa nĩngi saĩngeqnum. ³ Iga Anjam di gago nãdamu na unoqnem. Iga a quoqnem. Deqa iga a qa nĩngi saĩngeqnum. Di kiyaaqa? Nĩngi iga ti beterosim are qujaitosim sqajqa deqa. Agi nĩngi iga ti Abu Qotei aqa Niri Yesus Kristus wo nanĩ aiyel beternjrsim nanĩ koba na are qujaitosim unum. ⁴ Iga nĩngi ti tulan areboleboleig-wajqa deqa iga anjam endi nenĩgreĩyosim nunĩgoq qariĩyonum.

Qotei a suwanõq di unu dego kere iga suwanõq di walweloqnom

⁵ Yesus Kristus a anjam endegsi mergonaq iga quem, “Qotei a pulon bul. Ambru bei aqaq di sosai.” Iga anjam di qusinqa agi nĩngi olo merĩgeqnum. ⁶ Iga marqom, “E Qotei beteryosim a ombla are qujaitosim unum.” Degsi mar-sinqa ariya iga olo ambruq di walwelqom di iga gisaĩgeqnum. Iga kumbra bole dauryosaieqnum. ⁷ Qotei a suwanõq di unu dego kere iga suwanõq di walwelqom di iga Qotei aqa tamo unĩgasari kalil nanĩ ti beterosim are qujaitosim sqom. Degsi sqom di Qotei aqa Niri Yesus aqa len aiyej qaji

dena gago une kalil yansetgimqa iga aqa n̄amgalaq di tamo bole une saīqoji sqom.

⁸ Iga marqom, “E une yosaieqnum.” Degsi marqom di iga gago segi jejamu gisan̄yeqnum. Deqa anjam bole gago are miligiq di sqa keresai. ⁹ Ariya iga gago segi une babtosisim marqom, “Od, e une ti.” Degsi marqom di Qotei a iga uratgwasai. A kumbra bole t̄int̄in̄ dauryosim gago une yansetgwas. Osim gago kumbra uge kalil taqal waiyimqa iga aqa n̄amgalaq di tamo bole une saīqoji sqom. ¹⁰ Iga marqom, “E nami une yosaīoqnem.” Degsi marqom di iga Qotei aqa n̄am ugetoqnsim a gisan̄ tamo qa minjobuleqnum. Deqa aqa anjam gago are miligiq di sqa keresai.

2

Yesus a gago aqaryaigo tamo

¹ O ijo an̄gro kiñilala, niñgi une yoqnaib deqa e anjam endi nen̄gren̄yosim nun̄goq qarinyonum. Ariya niñgi qudei une yibqa aqaryaigo tamo Yesus Kristus a na niñgi aqaryain̄gwas. Yesus agi aqa Abu ombla sosiqa gaigai kumbra bole t̄int̄in̄ yeqnu. ² A gago une kobotetgosim Qotei aqa minjin̄ taqal waiyqajqa bej. A iga segi une kobotetgwajqa bosai. Tamo un̄gasari kalil mandamq endi unub qaji nan̄gi dego une kobotetn̄jqajqa bej.

Tamo a Qotei qa qalieqas di a Qotei aqa anjam dauryoqnaqas

³ Iga kiyersi endegsi qalieqom, “Bole, iga Qotei qa qalieonum”? E ubtosiy marqai. Iga Qotei aqa dal anjam dauryqom dena iga bole qalieqom.

⁴ Tamo bei a marqas, “E Qotei qa qalieonum.” Degsi marqas ariya a Qotei aqa dal anjam dauryosaieqnu. Deqa tamo di a gisañ tamo. Aqa are miligiq di anjam bole sosai. ⁵⁻⁶ Ariya tamo bei a Qotei aqa anjam dauryoqnqas di Qotei aqa qalaqalaiyqo kumbra tamo di aqa are miligiq di tulan kobaoqnsim siñgilaoqnqas.

Tamo bei a marqas, “E Qotei beteryejunum.” A degsi marqas di a kumbra kalil Yesus yoqnej qaji di dauryosim yoqneme. Iga degyqom di iga qalieqom, iga Qotei beteryejunum. ⁷ O ijo was bole, dal anjam e nengrenyonum qaji endi dal anjam bunuj sai. Endi dal anjam namij ningi nami quoqneb qaji. ⁸ Ariya dal anjam e nengrenyonum qaji endi dal anjam bunuj dego. A anjam bole. A Kristus aqaq di sosisqa nungoq di dego unu. Di kiyaya? Ambru a koboqa laqnaqa suwan a olo branteqnu deqa.

⁹ Tamo bei a marqas, “E suwanqoq di unum.” Degsi marqas ariya a na olo aqa Kristen was qudei nangi jeutnjreqnu. Deqa tamo di a suwanqoq di sosai. A ambruq di unu. ¹⁰ Tamo bei na aqa Kristen was nangi qalaqalainjroqnqas di iga unsim qalieqom, bole, tamo di a suwanqoq di unu. Deqa une bei na a ulontosaieqnu. ¹¹ Ariya tamo bei na aqa Kristen was qudei nangi jeutnjrqas di iga unsim qalieqom, tamo di a ambruq di sosisq walweleqnu. Ambru na aqa namdamu getetetqo deqa a sawa qabiteqnu di a qalieqasai.

¹² O ijo angro kiñilala, ningi quiy. Kristus aqa ñam na Qotei a nungo une kalil kobotetnjej. E deqa anjam endi nengrenyosim nungoq qarinyonum.

¹³ O abu niŋgi quiy. Tamo nami soqnej agi bini unu qaji a qa niŋgi qalieonub. E deqa anjam endi nengrenyosim nuŋgoq qarinyonum.

O angro wala, niŋgi Satan gotraŋyeqnuub. E deqa anjam endi nengrenyosim nuŋgoq qarinyonum.

¹⁴ O ijo angro, niŋgi Abu qa qalieonub. E deqa anjam endi nengrenyosim nuŋgoq qarinyonum.

O abu niŋgi quiy. Tamo nami soqnej agi bini unu qaji a qa niŋgi qalieonub. E deqa anjam endi nengrenyosim nuŋgoq qarinyonum.

O angro wala niŋgi quiy. Qotei aqa anjam nuŋgoq di unu deqa niŋgi siŋgila ti sosib Satan gotraŋyeqnuub. E deqa anjam endi nengrenyosim nuŋgoq qarinyonum.

Niŋgi mandam endeqa kumbra qalaqalaiyaib

¹⁵ O ijo was, niŋgi mandam endeqa kumbra qalaqalaiyaib. Tamo a mandam endeqa kumbra qalaqalaiyqas di a Abu qalaqalaiyqa keresai. ¹⁶ Mandam qaji tamo ungasari naŋgo kumbra agiende. Naŋgi naŋgo segi jejamu qa are prugn-jreqnaqa ñoro koba oqajqa mamaulnjreqnaqa tulan diqoqnsib laqnuub. Kumbra di Abu aqaq na bosai. Di mandam endeqa kumbra. ¹⁷ Mandam endi koboqas. Mandam endeqa are prugyoqa ti mamaulyoqa ti dego koboqab. Ariya tamo a Qotei aqa areqalo dauryoqnqas di a gaigai sqas.

Bini Kristus aqa jeu tamo gargekoba naŋgi branteqnuub

¹⁸ O ijo angro, diŋo bati jojomqo. Niŋgi nami queb, Kristus aqa jeu tamo kobaquja a bqas. Bini Kristus aqa jeu tamo gargekoba naŋgi branteqnuub. Deqa iga qalieonum, diŋo bati jojomqo.

¹⁹ Jeu tamo nan̄gi di gago ambleq di sosib olo iga uratgosib jaraiyeb. Di kiyaaqa? Nan̄gi gago Kristen was bolesai deqa. Nan̄gi gago Kristen was bole qamu nan̄gi iga koba na unum qamu. Ariya nan̄gi iga uratgosib jaraiyeb deqa iga qalieonum, nan̄gi gago Kristen was bolesai.

²⁰ Nin̄gi Qotei aqa Mondor Bole ejunub deqa nin̄gi kalil powo ti unub. ²¹ E anjam endi nen̄gren̄yosim nun̄goq qarinyonum. Di kiyaaqa? Nin̄gi anjam bole qalieonub deqa. Nin̄gi anjam bole qaliesai e deqa are qalsim anjam endi nen̄gren̄yosai. Nin̄gi qalie, anjam bole ti gisañ anjam ti ombla kerekere sai. Anjam bole na gisañ anjam bei babtqa keresai. ²² Gisañ anjam maro tamo nan̄gi tal qabe? E nin̄gi mer̄ngwai. Tamo nan̄gi di endegsib mareq̄nub, “Yesus a Kristus sai.” Nan̄gi degsib maroq̄nsib deqa nan̄gi Abu Qotei aqa N̄iri wo qoreiyeq̄nub. Osib Kristus jeuteq̄nub. ²³ Tamo a Qotei aqa N̄iri qoreiyq̄as di a Abu dego qoreiyq̄as. Tamo a Qotei aqa N̄iri qa aqa areq̄alo siñgilatq̄as di a Abu qa dego aqa areq̄alo siñgilatq̄as.

Qotei aqa Mondor na nin̄gi anjam bole mer̄ngq̄enu

²⁴ Anjam nin̄gi nami quoq̄neb qaji di nin̄gi olo siñgila na ojesoq̄niy. Ojesq̄ab di nin̄gi na Abu Qotei aqa N̄iri wo betern̄jrsib nan̄gi ti sqab. ²⁵ Nami Kristus na iga endegsi mergonaq̄ quem, “E nin̄gi ñambile en̄gitqa nin̄gi ñambile gaigai sqab.”

²⁶ O ijo was kalil, gisañ tamo nan̄gi na nin̄gi gisañgwajqa laq̄nub. E deqa are qalsim anjam endi nen̄gren̄yosim nun̄goq qarinyonum. ²⁷ Nin̄gi Kristus aqa Mondor eb agi nun̄goq di unu deqa nin̄gi powo

qa truquosaieqñub. Deqa e anjam bei totoryosiy niñgi merngeqñasai. Mondor a segi na anjam kalil niñgi merngeqñaq quoqñsib poiñgeqñu. Mondor aqa anjam di gisañ sai. Di anjam bole. Deqa niñgi Mondor aqa anjam di qusib poiñgim Kristus beteryosib soqñiy.

Iga Qotei aqa segi angro tinqin unum

²⁸ Od, ijo angro kiñilala, niñgi Kristus beteryosib soqñiy. Niñgi degyqab di mondon a olo brantimqa niñgi jemaingwasai. Niñgi are singilatosib aqa ulatamuq di tigelesqab. ²⁹ Niñgi qalie, Kristus aqa kumbra kalil tulañ bole. Deqa niñgi endegsib qalieoiy, tamo kalil kumbra bole yeqñub qaji nanği Qotei aqa segi angro tinqin unum. Nanği olo ñambabobulosib Qotei aqa angro branteb.

3

¹ Gago Abu Qotei na iga tulañ qalaqalaigeqñu. A na iga aqa segi angro sqa marsiq giltgej deqa iga aqa angro tinqin unum. Mandam qaji tamo nanği Qotei qa qaliesai. Deqa nanği iga qa dego qaliesai.

² O ijo was bole, iga Qotei aqa segi angro unum. Ariya mondon iga kiyersim sqom di iga gegerere qalieosai unum. Iga qalie, Yesus a olo bamqa iga a unsim iga a bul sqom. ³ Tamo unğasari kalil Yesus bam unqajqa tarineqñub qaji nanği nanço une olo urateqñub. Deqa nanği Qotei aqa ñamgalaq di jiga saiçoji unum. Agi Yesus a segi jiga saiçoji unu dego kere.

⁴ Une atqajqa kumbra ti dal anjam gotranjyqajqa kumbra ti di ombla kerekere. Deqa tamo unğasari une ateqñub qaji nanği Qotei aqa dal anjam gotranjyeqñub. ⁵ Niñgi qalie, Yesus a gago une kobotqa

bej. A segi une saiqoji. ⁶ Tamo bei a Yesus beteryesqas di a une atoqnqasai. Tamo bei a une atoqnqas di iga poigwas, a Yesus unosaieqnu. A Yesus qa qaliesai dego.

⁷ O ijo angro kiñilala, ningi gegerere nam atoqniy. Tamo bei na bosim ningi gisanqo uge. Ningi quiy. Tamo nanqi kumbra bole tintin dauryeqnub qaji nanqi tamo bole tintin unub. Yesus a tamo bole tintin unu dego kere. ⁸ Satan a nami une atoqnsiq boqnej agi bini a degyeqnu. Deqa tamo unqasari une ateqnub qaji nanqi Satan aqa angro unub. Ariya Qotei aqa Niri a Satan aqa wau kobotqa bej. ⁹ Tamo bei a olo nambabobulosim Qotei aqa segi angro brantqas di a une atoqnqasai. Aqa are miligiq di Qotei aqa segi nambile unu deqa a une atoqnqa keresai. Di kiyaga? A Qotei aqa segi angro unu deqa. ¹⁰ Tamo bei a Qotei aqa angro unu kiyo a Satan aqa angro unu kiyo di iga kiyersi qalieqom? E ubtosiy marqai. Tamo unqasari kumbra bole tintin dauryosaieqnub qaji nanqi Qotei aqa angro sai. Tamo unqasari nanqo Kristen was nanqi qalaqalainjrosaieqnub qaji nanqi dego Qotei aqa angro sai.

Yesus na iga qalaqalaiyo kumbra osorgej

¹¹ O ijo was kalil, iga segi segi qa qalaqalaiyo kumbra yoqnqom. Anjam di ningi nami queb. ¹² Deqa iga Kein aqa kumbra dauryqasai. Kein a Satan aqa tamo soqnej. A na aqa was Abel qalnaq moiyej. Kiyaga a na aqa was qalnaq moiyej? Utru agiende. A kumbra uge yoqnej deqa. Ariya Abel a kumbra bole tintin yoqnej.

¹³ O ijo was, mandam qaji tamo nanği na ninği jeutnğoqnibqa ninği deqa prugosib ulaaib. ¹⁴ Iga gago Kristen was nanği qalaqalainjreqnum deqa iga endegsi qalieonum, iga padalqa gam uratosim nambile gaigai sqajqa gamq di unum. Ariya tamo nanği nango Kristen was nanği qalaqalainjrosaieqnum qaji nanği padalqa gamq di unub. ¹⁵ Tamo nanği nango Kristen was nanği jeutnjreqnum qaji nanği leñ ojo tamo bul unub. Ninği qalie, leñ ojo tamo nanği nambile gaigai sqa keresai. ¹⁶ Yesus a aqa segi nambile uratosiq iga qa moiyej. Aqa kumbra dena a na iga qalaqalaiyo kumbra osorgej. Deqa iga dego gago segi nambile uratosim gago Kristen was nanği qa morenqom. ¹⁷ Tamo bei a mandam endeqa inği inği koba koroiyosimqa ariya aqa Kristen was bei inği saiqoji soqnim unsim a aqaryaiyqasai di iga endegsi qalieqom, Qotei aqa qalaqalaiyo kumbra tamo di aqa are miligiq di sosai. ¹⁸ O ijo anğro kiñilala, ninği quiy. Iga laña anjam maro na Kristen nanği qalaqalainjrqom di keresai. Iga kumbra bole dego turtosim enjroqnqom di kere.

Iga Qotei aqa ulatamuq di are lawo sqom

¹⁹⁻²⁰ Iga tamo unğasari nanği qalaqalainjrqom di iga endegsi qalieqom, iga anjam bole dauryeqnum. Deqa gago une bei na iga are gulbetetgwas di unğum, iga Qotei aqa ulatamuq di are lawo sqom. Qotei aqa qalie kobaquja. Aqa qalie dena gago are tulañ bunyejunu. ²¹ O ijo was bole, gago une bei na iga are gulbetetgwasai di iga are siñgilatosim Qotei aqa ulatamuq di tigelesqom. ²² Osim iga inği bei qa Qotei pailyimqa a gago

pailyo qusim inġi di egwas. Di kiyaaqa? Iga aqa dal anjam dauryoqnsim kumbra a areareteqnu qaji di yeqnum deqa. ²³ Qotei aqa dal anjam agiende. Iga aqa Niri Yesus Kristus aqa ñam qa gago areqalo singilatosim segi segi qa qalaqalaiyo kumbra yoqnqom. Qotei aqa dal anjam di a na nami iga mergonaq quem. ²⁴ Tamo bei a Qotei aqa dal anjam dauryqas di a Qotei beteryesqas. Qotei a kamba dego tamo di beteryesqas. Qotei na aqa Mondor iga egej deqa iga qalieonum, Qotei a iga betergejunu.

4

Niŋgi na mondor kalil naŋgi peginjroqniy

¹ Tamo gargekoba naŋgi mandamq endi laqnsi-bqa endegsib mareqnub, “Iga Qotei aqa medabu o qaji tamo bole.” O ijo was bole, naŋgo anjam di gisaŋ. Deqa niŋgi naŋgo anjam di nuŋgo areqaloq di singilataib. Niŋgi na mondor kalil naŋgi gegerere peginjroqnsib dena niŋgi qalieqab, naŋgi Qotei aqaq na beqnub kiyo sai kiyo. ² Tamo uŋgasari Qotei aqa Mondor ti unub qaji naŋgi endegsib mareqnub, “Yesus Kristus a tamo bulyosiqa mandamq aijej.” Dena niŋgi qalieqab, tamo uŋgasari naŋgi di Qotei aqaq na beb. ³ Ariya Yesus a tamo bulyosiqa mandamq aijej anjam di tamo uŋgasari Qotei aqa Mondor ti sosai qaji naŋgi saideqnub. Dena niŋgi qalieqab, tamo uŋgasari naŋgi di Qotei aqaq na bosai. Naŋgi mondor uge ti unub. Mondor uge di Kristus aqa jeu tamo kobaquja aqa segi mondor. Niŋgi nami queb, mondor uge di a bqas. Agi a bosiq mandamq endi laqnu.

⁴ O ijo angro kiñilala, ningi Qotei aqaq na beb. Qotei aqa Mondor a nungoq di unu deqa ningi na gisan anjam maro tamo nanngi gotranjnreqnub. Qotei aqa Mondor a na mondor agi mandam tamo nanngoq di unu qaji a tulan bunyeqnu. ⁵ Gisan anjam maro tamo nanngi di mandamq endena branteb deqa nanngi mandam qa segi anjam mareqnu. Mareqnab mandam tamo nanngi nanngo anjam quonqnsib dauryeqnub. ⁶ Iga Qotei aqaq na bem deqa tamo ungasari Qotei qa qalieonub qaji nanngi gago anjam quetgeqnu. Ariya tamo ungasari Qotei qa qaliesai qaji nanngi gago anjam quetgosaieqnu. Kumbra dena iga anjam bole qa Mondor ti gisan mondor ti nanngi peginjroqnsim nanngi qa poigeqnu.

Iga Qotei qalaqalaiyqom di iga Kristen nanngi dego qalaqalainjqom

⁷ O ijo was bole, Qotei a qalaqalaiyo kumbra qa utru. Deqa iga gago Kristen was nanngi qalaqalainjqom. Tamo kalil qalaqalaiyo kumbra dauryeqnub qaji nanngi olo nambabobulosib Qotei aqa segi angro tintin unub. Deqa nanngi Qotei qa qalieonub. ⁸ Qotei a segi qalaqalaiyo kumbra qa utru. Deqa tamo bei a qalaqalaiyo kumbra dauryqasai di a Qotei qa qalieqa keresai. ⁹ Qotei aqa Niri qujai unu. Qotei na a qarinyonaq mandamq aiej. Deqa iga aqa ñam na nambile gaigai sqom. Kumbra dena iga osorgej, Qotei na iga qalaqalaigeqnu. ¹⁰ Qotei a qalaqalaiyo kumbra qa utru. Deqa iga endegsi are qalqasai, iga namoqna Qotei qalaqalaiyem. Di sai. Qotei a namoqna iga qalaqalaiej. Osiqa

aqa Niri qarinyonaq mandamq aisiqa gago une kobotetgosiqa Qotei aqa minjin taqal waiyej.

¹¹ O ijo was bole, Qotei na iga degsi qalaqalaigeqnu deqa iga kamba dego segi segi qa qalaqalaiyo kumbra yoqnqom. ¹² Iga nami Qotei aqa ulatamu unosaioqnem. Ariya iga segi segi qa qalaqalaiyo kumbra yoqnqom di Qotei a gagoq di beteresoqnimqa aqa qalaqalaiyo kumbra di gago are miligiq di tulan kobaoqnsim singilaoqnqas.

¹³ Iga kiyersim qalieqom, Qotei a gagoq di beteresonaqa iga kamba dego a beteryejunum? E ubtosiy marqai. Qotei na aqa Mondor iga egej dena iga qalieqom. ¹⁴ Abu na tamo ungasari kalil mandamq endi unub qaji nanqi elenqa osiq deqa aqa Niri qarinyonaq mandamq aiyej. Aqa kumbra di iga unsim deqa saoqnsim laqnum. ¹⁵ Tamo bei a endegsi marqas, “Yesus a Qotei aqa Niri.” Degsi marqas di Qotei na a beteryesqas. Yimqa a dego Qotei beteryesqas. ¹⁶ Iga qalieonum, Qotei na iga qalaqalaigeqnu. Qalieosim deqa iga Qotei qa gago areqalo singilateqnum.

Qotei a segi qalaqalaiyo kumbra qa utru. Tamo a qalaqalaiyo kumbra dauryqas di a na Qotei beteryesqas. Yim Qotei a dego tamo di beteryesqas. ¹⁷ Beteryesoqnim qalaqalaiyo kumbra gago are miligiq di tulan kobaoqnsim singilaoqnqas. Bole, iga mandamq endi unum. Ariya iga Yesus bulosim unum deqa mondon Qotei na iga pegigwa batiamqa iga are singilatosim aqa ulatamuq di tigelesqom. ¹⁸ Tamo a qalaqalaiyo kumbra dauryqas di a ulaqasai. Aqa are miligiq di qalaqalaiyo kumbra tulan

kobaoqnsiq siŋgilaeqnu deqa ulaqajqa kumbra aqaq di sosai. Ulaqajqa kumbra aqa utru agiende. Tamo bei a are qaleqnu, “Mondon Qotei na e ŋolawotbosim awai uge ebqas.” A degsi are qaloqnsiq deqa a ulaeqnu. A degsi ulaeqnu deqa iga qalieonum, aqa are miligiq di qalaqalaiyo kumbra siŋgilaosaiunu.

¹⁹ Iga gago Kristen was naŋgi qalaqalainjreqnum. Di kiyaaqa? Qotei a namoqna iga qalaqalaisej deqa. ²⁰ Tamo bei a marqas, “E Qotei qalaqalaiyeqnum.” Degsi marqas ariya a na olo aqa Kristen was naŋgi jeutnjreqnu. A na naŋgi qalaqalainjrosai eqnu. Deqa tamo di a gisaŋ tamo. A na aqa Kristen was agi naŋgo ulatamu gaigai uneqnu qaji naŋgi qalaqalainjrosai eqnu. Deqa iga qalieonum, a Qotei agi aqa ulatamu nami unosaioqnej qaji a dego qalaqalaiyqa keresai. ²¹ Tamo a Qotei qalaqalaiyqas di a aqa Kristen was naŋgi dego qalaqalainjreme. Dal anjam di iga Yesus aqaq na em.

5

Iga mandam endeqa siŋgila gotraŋyeqnum

¹ Yesus a segi Kristus. Tamo naŋgi degsib maroqnsib Yesus qa naŋgo areqalo siŋgilatqab di naŋgi olo ŋambabobulosib Qotei aqa aŋgro tiŋtiŋ sqab. Tamo naŋgi Abu qalaqalaiyqab di naŋgi aqa aŋgro naŋgi dego qalaqalainjr qab. ² Iga Qotei qalaqalaiyosim aqa dal anjam dauryqom di iga qalieqom, iga Qotei aqa aŋgro naŋgi dego qalaqalainjreqnum. ³ Qotei qalaqalaiyqajqa kumbra agiende. Iga aqa dal anjam dauryqom. Iga

aqa dal anjam dauryqajqa di gulbe sai. Di oto. ⁴ Tamo nanği olo n̄ambabobulosib Qotei aqa segi anğro unub qaji nanği mandam endeqa singila gotranjoqnqab. Od, iga Qotei qa gago areqalo singilatqom di iga qoto bunjoqnsim mandam endeqa singila gotranjoqnqom.

Qotei na aqa Niri qa anjam babtej

⁵ Tamo kiyero nanği mandam endeqa singila gotranjoqnqab? E ubtosiy marqai. Tamo nanği di mareqnub, “Yesus a Qotei aqa Niri.” Nanği degsib maroqnsib Yesus qa nanço areqalo singilateqnub deqa nanği segi mandam endeqa singila gotranjoqnqab. ⁶ Yesus Kristus a bosiq̄a ya na yanso ej. Osiqa n̄amburbasq̄ di moinaqa aqa leñ aiej. A ya na yanso oqajqa deqa segi bosai. A moyimqa aqa leñ aqajqa deqa ti bej. Qotei aqa Mondor a anjam bole qa utru. A Yesus Kristus aqa anjam babteqnu. ⁷ Tamo qalub nanği Yesus aqa anjam babteqnub. ⁸ Tamo qalub agiende. Mondor ti ya ti leñ ti nanği qalub anjam qujaitosib Yesus aqa anjam babteqnub.

⁹ Tamo lanaj nanği iga anjam mergwab di iga qusim marqom, bole. Ariya Qotei na aqa segi Niri qa anjam iga mergeqnu. Anjam dena tamo lanaj nanço anjam tulan bunyejunu. ¹⁰ Tamo nanği Qotei aqa Niri qa nanço areqalo singilatqab di nanği aqa anjam dego nanço are miligiq̄ di atib sqas. Ariya tamo nanği Qotei aqa anjam deqa nanço areqalo singilatqasai di nanği na Qotei aqa n̄am ugetosib Qotei a gisan̄ tamo qa minjobulqab. Di kiyaaqa? Nanği Qotei aqa Niri qa anjam Qotei na iga mergeqnu qaji di nanço areqaloq̄ di singilatqasai

deqa. ¹¹ Qotei aqa anjam agiende. A na iga nambile gaigai sqajqa marsiq nambile egej. Nambile di Qotei aqa Niri aqaq di unu. ¹² Tamo bei a Qotei aqa Niri beteryesqas di a nambile oqas. Ariya tamo bei a Qotei aqa Niri beteryesqasai di a nambile oqasai.

Iga qalieonum, iga nambile gaigai sqom

¹³ O ijo was, ningi Qotei aqa Niri aqa ñam qa nungo areqalo singilateqñub. E na anjam endi nenngrenyosim nungoq qarinyonum. Di kiyaaqa? Ningi bole qalieqajqa, ningi nambile gaigai sqab. ¹⁴ Iga ingi bei qa pailyqa osimqa iga Qotei aqa areqalo dauryosim pailyqom di a gago pailyo quqwas. Deqa iga ulaqasai. Iga are singilatosim Qotei aqa ulatamuq di tigelesqom. ¹⁵ Iga qalieonum, Qotei a gago pailyo gaigai queqnu. Deqa iga ingi bei qa Qotei pailyimqa a na egwas.

¹⁶ Ningi na Kristen was bei a une atim unsibqa ningi a qa Qotei pailyiy. A moiqaajqa une atosai deqa ningi a qa pailyibqa Qotei na aqa une kobotim a moiqasai. A nambile sqas. Ariya Kristen tamo bei a moiqaajqa une atqas di Qotei na a qalim moiqas. Ningi a qa pailyqajqa e na merngosai. ¹⁷ Kumbra uge kalil tamo nanngi yeqñub qaji di une. Ariya une qudei qa Qotei na tamo nanngi moyotnjrosaiqnu.

¹⁸ Iga qalie, tamo unngasari Qotei aqa segi angro unub qaji nanngi une atosaiqñub. Qotei aqa Angro Yesus a na nanngi taqatnjreqnu deqa tamo uge Satan na nanngi ugeugeinjrqa keresai. ¹⁹ Iga qalie, iga Qotei aqa segi angro unum. Mandam qaji tamo unngasari kalil nanngi tamo uge Satan aqa sorgomq di unub. Deqa a na nanngi singila na taqatnjreqnu.

²⁰ Iga qalieronum, Qotei aqa Niri a bosiq iga powo egej deqa iga Qotei qa bole qalie. Iga Qotei beteryejunum. Iga aqa Niri Yesus Kristus dego beteryejunum. Yesus a segi Qotei bole. A segi nambile gaigai sqajqa utru.

²¹ O ijo anğro kiñilala, niñgi gisañ qotei kalil nañgi torei qoreinjrsib sasaloiy.

Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini, 2014
copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 3 Mar 2023 from source files dated 9 Oct 2020

0eb339dc-c20a-5065-9483-338933d97585